

# Iman perisai halang keburukan kuasai diri

Saya tertarik dengan laporan disiarkan akhbar BH bertarikh 7 Jun mengenai kegiatan sepasang suami isteri yang menjadikan surau dan masjid di sekitar Selangor sebagai lokasi untuk mencuri.

Mereka bukan saja menyusahkan orang ramai yang datang ke masjid untuk melakukan ibadah, malah mencemarkan institusi masjid itu sendiri sebagai tempat yang mulia dan suci.

Kebelakangan ini, kejadian jenayah seperti curi, rompak, ragut dan sebagainya semakin menjadi-jadi di dalam negara kita. Sebagai masyarakat kita tidak boleh menuding jari kepada sesiapa melainkan diri kita sendiri yang perlu menjadi mata, kaki dan tangan kepada pihak berkuasa dalam menangani masalah ini.

## Tindakan pantas tangani masalah

Tindakan pantas masyarakat sekeliling yang mengetahui mengenai aktiviti jenayah di sekeliling mereka dengan melaporkannya segera kepada pihak berkuasa sedikit-sebanyak dapat membantu pihak berkuasa menangani masalah ini.

\* Seharusnya setiap Muslim perlu mem-

benteng diri mereka dengan iman yang kuat agar dapat menghindarkan diri daripada godaan dunia yang dapat membawa mereka ke dalam keburukan.

Sesungguhnya setiap rezeiki itu datanginya daripada Allah. Oleh itu, setiap manusia perlu berusaha mencari pekerjaan yang halal untuk memberikan nafkah kepada keluarga masing-masing. Sesungguhnya Islam melihat pekerjaan sebagai suatu yang cukup bernilai. Malah Islam menganggap kasbu al-halal atau bekerja untuk memperoleh pendapatan yang halal adalah suatu jihad.

Dalam satu hadis Nabi SAW bersabda: "Sesiapa yang bermalam dalam keadaan penat kerana mencari rezeiki halal maka dia bermalam dalam keampunan (Tuhan)." (Riwayat Ibnu Asakir daripada Anas).

Ia menjadi tanggungjawab peribadi masing-masing dalam menentukan apa yang terbaik dapat dilakukan dalam hidup. Apabila seseorang itu memiliki iman yang kuat, maka mereka dapat menepis segala anasir buruk. Sesungguhnya iman yang akan mengingatkan dan membezakan manusia antara perkara baik dan buruk.

Nor Fatimah Zainudin  
USIM, Nilai